



Na osnovu člana 2.9 stav (1) tačka 19. Izbornog zakona BiH ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16 i 41/20, 38/22, 51/22, 67/22 i 24/24) i člana 14. Pravilnika o postupku imenovanja i razrješenja biračkih odbora za Lokalne izbore u Bosni i Hercegovini 2024. godine, ("Službeni glasnik BiH", broj 31/24), Centralna izborna komisija BiH je na 32. održanoj 13.06.2024. godine, donijela

O D L U K U
o načinu i uvjetima imenovanja i rada instruktora u timovima za obuku za Lokalne izbore 2024. godine

Član 1.
(Predmet)

Odlukom o načinu i uvjetima imenovanja i rada instruktora u timovima za obuku za Lokalne izbore 2024. godine utvrđuju se organizacijska struktura, način imenovanja, opći i posebni uvjeti za imenovanje, prava i obveze instruktora, način rada instruktora u timovima za obuku, kao i procedure za razrješenje.

Član 2.
(Organizacijska struktura)

- (1) Centralna izborna komisija Bosne i Hercegovine će posebnom odlukom, imenovati Tim instruktora.
- (2) Izabrani instruktor iz Tima instruktora bit će raspoređen za rad u tim za obuku kandidata za predsjednika/zamjenika predsjednika biračkog odbora za svaku osnovnu izbornu jedinicu u Bosni i Hercegovini.

Član 3.
(Javni oglas)

- (1) Izbor instruktora izvršit će se u skladu sa javnim oglasom za izbor instruktora u Tim instruktora zaduženih za obuku kandidata za predsjednika/zamjenika predsjednika biračkog odbora
- (2) Ukoliko nakon provedenog javnog oglasa Centralna izborna komisija BiH ne izabere dovoljan broj instruktora, isti se popunjava direktnim pozivom kandidatima koji zadovoljavaju opće i posebne uslove.

Član 4.
(Opći uslovi)

(1) Kandidat za instruktora mora biti lice sa pravom glasa tj. da je upisan u Centralni birački spisak Bosne i Hercegovine (da je stariji od 18 godina, da je državljanin Bosne i Hercegovine i da ima prijavljeno prebivalište u Bosni i Hercegovini) i mora da posjeduje zdravstvenu sposobnost za obavljanje poslova i radnih zadataka koji se traže javnim oglasom.

(2) Za instruktora ne može biti imenovano lice:

- 1) koje se ne može kandidirati u smislu odredbi članova 1.6, 1.7 i 1.7a Izbornog zakona Bosne i Hercegovine;
- 2) koje je nosilac izabranog mandata ili je član izvršnog organa vlasti, osim u slučajevima kada je kandidat za instruktora osoba iz člana 2.12 stav (4) Izbornog zakona Bosne i Hercegovine;
- 3) koje je aktuelni kandidat ili je bio kandidat za bilo koji nivo vlasti na posljednjim Općim i posljednjim Lokalnim izborima;
- 4) kojem je izrečena kazna za radnju koja predstavlja težu povredu izbornih zakona ili propisa za koju je lično odgovorno, u posljednje četiri godine, računajući od dana pravosnažnosti odluke i
- 5) koje je član političke stranke ili obavlja dužnosti u organima političke stranke, udruženja ili fondacije organizaciono ili finansijski povezanim s političkom strankom, niti smije biti uključen u bilo kakve aktivnosti političke stranke i mora biti u mogućnosti da obavlja svoje dužnosti na politički nepristrasan način.

Član 5.
(Posebni uslovi)

Kandidat za instruktora mora:

- 1) da ima završen VII/1 stepen stručne spreme, odnosno visoko obrazovanje prvog, drugog ili trećeg ciklusa Bolonjskog sistema studiranja, ili VI ili IV stepen stručne spreme;
- 2) da posjeduje vještine za uspješno izvođenje obuke i prenos znanja – i po mogućnosti sertifikat izdat od Centralne izborne komisije BiH o uspješnom završetku obuke za instruktore predsjednika i članova biračkih odbora; -
- 3) da posjeduje iskustvo u provedbi izbora – članstvo u izbornoj komisiji, članstvo u biračkom odboru ali ne po prijedlogu političkog subjekta, rad u stručnim organima koji su pružali pomoć u provedbi izbora.

Član 6.
(Intervju)

(1) Sa kandidatima za instruktore koji budu ispunjavali opće i posebne uvjete javnog oglasa obavlja se on-line intervju.

(2) O vremenu održavanja on-line intervjuja Centralna izborna komisija BiH kandidate obavještava putem e-maila najkasnije 3 (tri) dana prije održavanja on-line intervjuja, kao i putem internet stranice Centralne izborne komisije BiH www.izbori.ba.

(3) Ukoliko kandidat za instruktora ne pristupi online intervjuu u tačno zakazanom terminu smatrat će se da je odustao od daljnje oglasne procedure.

Član 7.
(Lista uspješnih kandidata)

(1) Nakon održanog on-line intervjuja Centralna izborna komisija BiH utvrđuje Listu uspješnih kandidata po osnovnim izbornim jedinicama.

(2) Prilikom formiranja Liste uspješnih kandidata iz stava (1) ovog člana posebno će se bodovati:

- a) posjedovanje certifikata Centralne izborne komisije BiH o završenoj obuci za predsjednike i članove biračkih odbora,
- b) trenutni i bivši članovi izbornih komisija osnovnih izbornih jedinica u BiH,
- c) posjedovanje većeg izbornog iskustva.

(3) Bodovanje iz stava (2) izvršit će se kako slijedi

	Broj bodova
Trenutni i bivši članovi izbornih komisija osnovnih izbornih jedinica u BiH	5
Izorno iskustvo	2
Certifikat Centralne izborne komisije BiH o završenoj obuci za predsjednike i članove biračkih odbora	2
Iskustvo u edukaciji	1

Član 8.
(Prava i obaveze instruktora)

(1) Za obavljanje poslova Centralna izborna komisija BiH će sa instruktorima zaključiti ugovor o djelu kojim će regulirati prava i obaveze.

(2) U slučaju da izabrani kandidat odustane od angažmana ili ne prođe obuku i testiranje, predsjednica Centralne izborne komisije BiH će donijeti odluku o prijemu drugog kandidata sa Liste uspješnih kandidata, vodeći računa o izornoj jedinici.

(3) Imenovani instruktor će biti obavezan proći obuku, testiranje i certificiranje koje će organizirati Centralna izborna komisija BiH.

(4) Nakon što preuzme certifikat instruktor će imati obavezu da izvrši obuku predsjednika biračkih odbora i njihovih zamjenika prema Planu i programu obuke predsjednika biračkih odbora i njihovih zamjenika kojeg donosi Centralna izborna komisija BiH.

(5) Centralna izborna komisija BiH će posebnom odlukom odrediti visinu naknade za rad instruktora.

Član 9. (Stupanje na snagu i objavljivanje)

Ova Odluka stupa na snagu danom donošenja.

Broj: 05-1-02-2-849-1/24
Sarajevo, 13.06.2024. godine

